

數見身出或採伐貿易衣糧而人不知

### 泰宜寶洞元真仙墟

丹臺新錄周亮字泰宜師姚坦得其術人有能飛沙走石一切妖魅事亮卽持經誦呪邪物各復其形或死於左右常與神仙遊行寶洞嘯詠終日

廣記薛元真少好道時棲五嶺謂人曰九嶷五嶺神仙之墟山水幽奇煙霞勝異如陽朔之峰巒挺拔博羅之洞府清虛不可忘也所以祝融棲神於衡阜虞舜登仙於蒼梧赫胥燿跡於瀛峰黃帝飛輪於鼎湖其餘高仙列真神人輔相騰翥逍遙者其故何哉山幽而靈水深而清松竹交映雲蘿杳冥固非凡骨塵心之所愛也况邃洞之中別開天地瓊漿滴乳靈草秀芝豈塵目能窺凡屣所履耶得延年之道而優游其地信爲樂哉

### 世雲羽扇玄同飈車

高道傳吳猛字世雲自鍾陵還欲濟大江遇飄風怒濤遂以白羽扇畫水而渡眾皆異之

集仙錄薛玄同號玄同子誦黃庭經不替遇神仙下降告之曰子誦黃庭有功地司累奏簡在紫虛之府因授口訣至咸通間紫虛元君降授九華之丹曰服此當遣飈車迎汝歸嵩山矣是夕解化無尸表奏僊宗異之

### 道藏輯要

三洞羣仙錄

卅

翼集四  
川上八